古典小說 佳作 胡紹平

個人簡介:中興大學中國文學系博士班五年級

胡紹平,豢養狸奴三坨,自號三貓大夫。家藏書七千冊,七百尊手辦,七百 盒模型,珍藏七弦琴一把,家中筆電、桌電、平板共七台,電玩遊戲約略七百種。 久居不出,七日沐浴一回。沐浴則賦詩,戲曰七日一詩。故又號八七居士。

\_\_\_\_\_\_

《銜蟬囈語集》

序

黃山谷〈乞貓〉詩曰:「聞道狸奴將數子,買魚穿柳聘銜蟬。」後文人好以「狸奴」、「銜蟬」為貓之異名。余為詩詞,依法習之,小有所得。奈「下流誠難處,望遠亦多悲」,恐是凡人著文,並無稀罕。又嘗思之,若狸奴善詩,則當名噪一世。故謂詩友云:「吾之詩文,皆虎子夢中所云耳。銜蟬不立文字,狸奴懶畫倉頡,故由吾人提筆記之。」友人笑答:「貓豈能人語耶?直妄言耳!」然我輩所言或狸奴所述?實無所異。昔莊周夢蝶,不知周之夢為蝴蝶與?蝴蝶之夢為周與?今吾人所作詩文,亦同此理。遂定名「銜蟬囈語」。

## 1. 〈狸奴夢〉

辛丑聞風城有飼狸奴者,張姓,未曉其名,好書畫,喜讀古,名其貓以「坡仙」、「稼軒」。張生性質實,不好脂韋,惟奉狸奴尚奢,鄰里喚其「貓癡」。

一日,張生閒坐,日將晡,宜午睡。忽見一虎紋狸奴揖而稱曰:「吾名虎兒, 見汝園中有蝶,我族喜戲此物,可否?」張生驚狸奴竟可人語,繼翻然而喜,笑 曰:「君等不嫌,可長居此,僕日日供魚俸肉,吾家波仙、稼軒可為證。」虎兒 頷首再拜,呼喝數十隻狸奴湧入院中,嬉鬧之間,花殘葉落,鳥鳴蟲飛。張生狂 喜,嘆此狸奴之眾,生平未見也。

遂與眾狸奴相逐於院,歌舞於廳,嬉鬧於室,坐臥其間,載歡載樂,又口占一曲〈醉花間〉,曰:「床飛散,紙飛散,飛散心煩亂。無懼虎賁姿,鉸剪同君戰。冰肌鮮血漫,鐵戟興兵燹。居高固角樓,鉤爪誰能斷?」吟罷,忽覺頷頰吃痛,驚呼而醒,竟獨臥於廊上,是時月明如水,稼軒以爪撫其面,似有所求。張生起,見稼軒坡仙徹鳴不已,料是乞食,然觀其糧盆正滿,怪之。左近忽傳貓鳴哀哀,氣如絲矣。張生循聲往,乃得貓幼崽三五於道旁溝渠。

詩云:「善緣看似夢,惡事勿臨頭。」張生環顧,見虎斑貓母屍首於側,思 前夢,或有所意。故以竹簍取之,收幼崽安住其家。更吟〈撲蝴蝶〉曰:

婆娑謾舞,仙姿多化幻。莊周睡意,西園青草伴。翩翩彩翼凝芳,只是良辰苦短,忽逢虎貓驚斷。 碎香瓣。攫撲躍跳,忍將頑軀散。花前不語,

一身寒血漫。粉翅殘影無聲,浮世何曾夢覺,今宵夜歌誰喚? 蓋聞物皆有靈,斯貓也,靈慧尤甚,能擇飼主也耶?揀其奴僕也耶?或實為知其 友愛泛物,兼愛為親也耶?今張生不為狸奴託夢所魘,自以豢貓為福矣。

#### 2.〈怠症〉

北市文人曾亮,娶妻游氏,略通詩詞文賦,夫妻鴻案相莊。奈何貧賤書生, 窮困潦倒,甑塵釜魚。亮有詩友岳清,乃半線學庠先生、文壇大儒,屬忘年交。 民國己亥,亮欲往會晤以求饔飧,只是盤纏難備,思止此行,又恐輕諾寡信之名, 終日不決,長吁短嘆。游氏慰曰:「貧士當有志,人生之道,否極泰來,窮達自 有其時。汝今有幸,豈可輕棄際遇。妾之嫁妝已委人變賣,籌君盤纏。」又為之 備妥行囊,促其速行。

然亮患怠症,每遇要事,總犯病而延宕數日。此次亦然,雖已籌足盤纏,但 其怠症又起,畫不食,夜不寢,正事無所作為,整日閒望於宅。游氏見此,雖知 此為病症,奈何本就衣單食薄,恐將無衣無食,乃勸曰:「君若得舉用,定輝映 千古,今故友居要職,謁之得邀,日後何需愁食?蛟龍需雲雨,良駒乞伯樂.....」 話音未落,亮已惛惛睡去。游氏含淚,思亮之怠症,若非猛藥不可治也。思之再 三,乃有定念。

次日,亮喚游氏,欲問食時,未得應答,乃起身尋之,不見游氏身影,但見 一紙與行囊於案,有詞二闋,詞名〈憶秦娥〉:

情別黯。累牆追影心扉掩。心扉掩。春歸何處?怎能無憾。 朝陽落日如愁染。佳期誰憶紅顏淡。紅顏淡。相思無度,一生懸念。

年華遠。語空詞斷終凝咽。終凝咽。香魂無據,可憐誰見。 枕前淚曲 求何願?黃姑織女西飛燕。西飛燕。休驚妾夢,此情長怨。

亮見二詞,哽咽不能言。知是游氏無奈所作,怨其因怠症之不為,故而離去,次次一別,恐再無相見之日。亮痛定思痛,越發有愧於心,怠症不治,縱使懷才亦不得遇也。當機立斷,拾起游氏詞作與行囊,驅車前往半線。

約莫兩個時辰,亮抵半線,謁岳清於卦山,相談甚歡,清好其才情,薦入職。 亮得岳清舉薦,得位於學庠,立名於文壇,求親者絡繹不絕,但其念情游氏,終 不復娶。有道是:「心病還需心藥理。」曾亮之怠症,非常理可治,惟當頭棒喝, 方能成藥矣。

#### 3. 〈佳人不誤功名〉

庚子初,大肚山學子王仁,博學多才,能詩文,尤長於宮體,因欲取功 名,終日苦讀。一夕,王仁挑燈夜讀,怠將就寢,忽聞叩門聲,王仁惑,謂時 已三更,何有人訪?啟窗但見一少女亭亭而佇,長髮堆鴉,玉肌冰膚,眉如鉤 月靨似桃,姿容絕代。女致曰:「奴家林兒,吾主聞君苦讀,特令奴家迎公子前 往一敘。」王仁雖疑,然色授魂與,遂同往。女見王仁出,執其右手,瞬至宮 門大院。

苑中麗櫚雕楹,珠簾繡帷,仁見一楹上刻聯曰:「水月鏡中天上女,晶屏畫裡酒中仙。」橫匾以金字書「水晶宮」三字,蓋一鶴頂聯也。女引王仁上殿,一婦居中,繡裳鳳帔,目露祥和,身有貴氣,左右仕女各數十,捧劍持扇,威儀千萬。王仁下拜,婦人曰:「妾身水晶宮宮主,素聞公子詩名遍徹,惜未一

晤,特邀公子赴宴,毋怪。」於是為王仁舉筵。

宴後,婦人邀王仁遊園,論詩議文,知王仁善宮詞,遂命仕女取筆墨, 曰:「妾非當世之人,然酷愛詞章文墨,猶喜宮體,盼先生允賜墨寶,留以思 慰。」王仁諾,片時揮毫立就宮詞五首:

山棲谷飲覽群芳,岸柳懷情晝夜長。逢見青腰傾笑靨,花前月下美人妝。 雨覆雲翻意半懸,宮眉玉枕慕修仙。真純不掩朱顏麗,貴寵憂危妒媚妍。 二八佳人體似酥,階前醉望酒家胡。堂中幾度尋真趣,夢裏悠然畫鷓鴣。 綾羅凝妝舞霓裳,瀨淺雲翻夜未央。美眄柔情揚翠翰,音嬌曲豔問新牀。 杉篙擺渡惹凌波,浦柳飛揚絮似娥。美惡何須誰待予,由來只問意婆娑。 婦人大喜,命取金珠厚幣,皆非塵世能有,以贈王仁。王仁甚喜,再拜。.

王仁言歸,婦人又令林兒上前,更贈王仁曰:「此女生於閬苑松柏之間,故 名林兒,雖非佳色,尚堪添香,亦稱可憐,可以侍讀侍茶,今贈從先生,以誌 今日之會,望先生此去珍重。」王仁欣然稱謝再拜,攜林兒返還,結為夫妻。 其後,王仁以佳人在伴,苦讀愈奮。庚子六月,王仁赴國考,乃得功名。

### 4.〈觀李國修劇作《昨夜星辰》〉

凡間愛戀總多悲,未解風流只是癡。晤語纏綿婚嫁外,心知縹緲去留時。春來醉裡常懷夢,別後樽前怎致思。昨夜星辰還憶否,明朝更念乃翁慈。

## 5. 〈讀黃春明小說〈死去活來〉〉

病體老年輕,殘身瘦骨形。今朝吁薄命,次日喜新晴。 死去當悲咽,重來又怨生。親親安可養,孝意幾能明?

#### 6. 〈青玉案・思郷〉

今宵把酒樽壺煮。月圓夜、徒空佇。可奈風流遊憩處。滿懷萱草,解憂忘苦。怯 問歸鄉路。 錦書遙寄情難署。只道殘鍾廣陵樹。痛飲狂歌誰共舞。淚痕衃血, 舉杯不顧。醉語誰相訴。

## 7. 〈一剪梅〉

夜色蕭然話古音。筆下流光,致語難尋。依依枕畔憶君時,粉翼翩翩,蝶舞瑤琴。 夢斷香閨覓月陰。心似躊躇,淚滿衣襟。殘燈明滅有誰憐,尺素空言,嘆寄 蛩音。

#### 8. 〈人月圓·春寒書寢後作〉

寒風微冷眠床懶,雲雨暗藏春。被中睡意,流連枕上,熬惱拂晨。 不經磨折, 非關冷暖,殘夢重溫。飢腸鳴起,思量幾度,坐起長伸。

#### 9. 〈御街行·佳節無伴憶舊情有懷〉

冬風夢斷因何起。道別處、低聲思。愁腸幽語十年間,竟覺韶華流水。雲飛遮月, 夜寒侵枕,無計蕭然意。 長懷故事歡娛地。幾度問、難眠淚。初春情薄薄情 休,殘酒留杯憑倚。茶涼人去,晨曦依舊,新醉由誰寄。

# 10. 〈《人間失格》讀後〉

轉瞬蹉跎三十年,可堪菸酒與周旋。人生自此無難事,缺月雲間水月圓。